

諸法無行經

姚秦三藏法師鳩摩羅什譯



清刻龍藏佛說法變相圖

諸法無行經卷上

常一

姚秦三藏法師鳩摩羅什譯

如是我聞一時佛在王舍城耆闍崛山中共
大比丘僧五百人俱菩薩九萬二千人其名
曰衆德莊嚴菩薩摩訶薩師子遊步菩薩光
無障淨王菩薩高山頂自在王菩薩愛喜淨
光菩薩光蔽日月菩薩妙淨髻菩薩身出蓮
華光菩薩梵自在王音菩薩遊戲世師子王
音菩薩金色淨光威德菩薩柔輭身菩薩金
光相莊嚴身菩薩十光破魔力菩薩諸根威
儀善寂菩薩德如高山菩薩天音聲菩薩法
力自在遊行菩薩山德淨身菩薩妙德菩薩
摩訶薩如是等九萬二千人爾時師子遊步
菩薩見是大會即從座起偏袒右肩右膝著
地合掌白佛以偈問曰

世尊大導師

名德稱無量

今此大衆集

願說寂滅法

邪見癡愛慢

嫉妬瞋恚性

云何即是道

大音方便說

云何涅槃相

與世法無異

諸法性無二

大悲爲演說

云何諸法性

畢竟無罣礙

其性如涅槃

亦同於解脫

無縛亦無解

亦復如虛空

迦蘭頻伽音

大梵清淨聲

身色喻天金

淨命無量德

演說實相法

畢竟無縛解

云何此五蓋

而等於菩提

云何是菩提

即同諸業性

是法是非法

云何同一相

如是畢竟淨

唯願爲演說

無數無非數

諸法畢竟滅

一切種智相

及以菩提道

二法云何無

唯願爲演說

無作無非作

無著無非著

畢竟無衆生

諸法中無礙

無戒無忍辱

亦無毀戒者

無智亦無慧

亦非無智慧

是法常清淨

唯願爲演說

云何一切法

寂滅如虛空

無心心數法

無見斷證修

一切衆生類

同如虛空相

一相法亦無

心行亦叵得

諸法無生滅

無學無羅漢

亦無辟支佛

亦無求菩薩

無住無依止

無來亦無去

諸法不動相

常住如須彌

無相亦無色

色性即是道

色性佛道一

如是法願說

云何無佛法

亦無比丘僧

三寶是一相

唯願爲演說

無空無無相

亦無有無作

不合亦不散

名相法亦無

諸法畢竟空

如響無作者

無生無無生

無滅無往來

無天無龍神

夜叉緊那等

無人天地獄

無餓鬼畜生

無衆生五道

願說如是法

導師佛世尊

外道邪見者

其有所演說

云何等無二

文字諸語言 是法皆一相 世尊大慈悲
願開是法門

爾時世尊讚師子遊步菩薩摩訶薩言善哉
善哉善男子汝所問者甚爲希有一切世間
之所難信善男子止止勿問所以者何新發
意菩薩於此空見無相見無作見無生見無
所有見無取相見佛見菩提見所不能及善
男子如此法者不應在新學菩薩前說何以
故若聞是法或斷善業於佛道中則行邪道
若墮斷滅若墮計常不知如來以何方便隨
宜所說爾時師子遊步菩薩摩訶薩白佛言
世尊哀愍世間願必爲說當來世中有菩薩
空見無相見無作見無生見無所有見無取
相見佛見菩提見者分別是空是無相是無
作好常讀學勤於事業樂著文辭以辯說爲

妙貴於名利如是之人聞如來說是無文字
法畢竟清淨當捨是諸見是諸菩薩隨衆生
所能信解以方便力而爲說法雖說少欲知
足然不以爲最雖說經戒亦不以爲最說在
衆過惡亦知一切法遠離相常稱讚獨處不
在憤鬧然不以爲最雖讚發菩提心而知心
性即是菩提雖讚大乘經而知一切諸法皆
是大相雖說菩薩道而不分別阿羅漢辟支
佛諸佛雖讚布施而通達布施平等相雖讚
持戒而了知諸法同是戒性雖讚忍辱而知
諸法無生無滅無盡相雖讚精進而知諸法
不發不行相雖種種讚歎禪定而知一切法
常定相雖種種讚於智慧而了智慧之實性
雖說貪欲之過而不見法有可貪者雖說瞋
恚之過而不見法有可瞋者雖說愚癡之過

而知諸法無癡無礙相雖示衆生墮三惡道
怖畏之苦而不得地獄餓鬼畜生之相如是
諸菩薩雖隨衆生所能信解以方便力而爲
說法而自信解一相之法所謂空無相無作
無生無所有無取相世尊唯願說是不可思
議方便之法一切聲聞辟支佛及新發意菩
薩所不能及但爲信解甚深一相法者說之
爾時佛告師子遊步菩薩摩訶薩言善男子
汝今諦聽善思念之吾當爲汝解說此義唯
然世尊我當受之爾時世尊以偈答曰

帝一

若人欲成佛 勿壞於貪欲 諸法即貪欲
知是則成佛 貪欲瞋恚癡 無有能得者
是法皆如空 知是則成佛 見非見一相
著不著亦然 此無佛無法 了是名大智
譬如人於夢中 得佛道度衆生

此無道無衆生 佛法性亦復然
坐道場無所得 若不得則不有
明無明同一相 知如是爲世尊
衆生性即菩提 菩提性即衆生
菩提衆生不二 知如是爲世尊

譬如巧幻師 幻作種種事 所見無有實
無智數若干 貪恚癡如幻 幻三毒無異
凡夫自分別 我貪我瞋恚 知是愚癡人
則墮三惡道 實相無貪恚 癡亦不可得
分別如幻法 自生煩惱熱 實相無煩惱
無佛及衆生 分別無生法 凡夫願欲得
不見佛興法 亦不見衆生 知是法相者
疾成衆生尊 若人求菩提 則無有菩提
是人速菩提 譬如天與地 知諸法如幻
速成人中上 若人分別戒 是則無有戒

帝一

五

若有見戒者	是則爲失戒	戒非戒一相
知是爲導師	如夢受五欲	娛樂自快樂
分別見女色	此中實無女	戒毀戒如夢
凡夫分別二	實無戒毀戒	知是爲導師
凡夫著名字	不知語言性	名字非名字
知是得無生	自謂是菩提	讀誦爲人說
已身無所行	但依恃種姓	但讀經求道
常見他人過	著威儀文頌	見人敬自貴
恃種姓文頌	不知法實相	如是之人等
終不能得佛	爲說諸法空	惡心好諍訟
是人無佛法	亦無有菩提	知慧忍同相
達是終不瞋	不了衆生性	是則生瞋恚
自言菩薩者	復作如是說	我慈悲一切
成佛度衆生	他惱生瞋恚	懷忿不與語
常求他人過	樂於鬭諍訟	亦稱歎忍辱

及說諸法空	我心多憍慢	常觀他人過
貪著於美味	晝夜念五欲	是人入城邑
自說度人者	悲念於衆生	常爲求饒益
口雖如是說	而心好惱他	我未曾見聞
慈悲而行惱	互共相瞋恚	願生阿彌陀
若人如恒河	惡口加刀仗	如是皆能忍
則生清淨土	佛土非佛土	知如虛空相
不分別國土	及國土功德	如是之人等
能生諸佛國	自言忍衆惡	見菩薩如佛
我未曾見聞	佛相而瞋者	各自美毀他
樂檀越知識	言我所教化	護使令如法
汝應我所度	莫親近餘人	彼人行不純
常處於憒鬧	是人於佛道	不能勤修行
真求佛道者	晝夜各三時	頂禮諸菩薩
應生恭敬心	隨其所行道	不說其過失

若見著五欲 亦不說過惡 應當念彼人
久後必得道 次第行業道 不可頓成佛
或非久發心 是故行此事 勿分別貪欲
貪欲性是道 煩惱先自無 未來亦無有
能作是信解 便得無生忍 觀好惡音聲
知非音聲性 當入無文字 實相之法門
若能信是法 則無姪怒癡 觀貪欲愚癡
即是無量相 是二無文字 以文字故說
諸有文字處 是皆無有實 一切諸音聲
觀是一音性 佛說及邪說 是皆無分別
法雖以言說 實無法無說 能入一相門
是得無上忍 是忍是非忍 勿作是分別
於欲瞋恚心 勿計其中利 知是二無生
當爲世中尊 東西南北方 如恒河沙土
皆碎爲微塵 一塵爲一國 滿中諸珍寶

於無央數劫 供養諸如來 其所得功德
若人聞是經 過彼百千倍 若有出家人
一心求佛道 我囑累是人 此秘密要法
若有誦是經 及解說其義 無量總持辯
自然皆當得 利根無盡慧 樂說之辯才
無量億諸佛 皆亦與是人 諸經妙法寶
自然皆能說
爾時師子遊步菩薩白佛言世尊今說是偈
有幾所人得自利益佛言善男子汝見是大
衆不唯然已見佛言說是法時會中有無量
無數衆生與天龍夜叉捷闍婆阿脩羅緊那
羅迦樓羅摩睺羅伽等滿虛空中以說法明
乃至他方世界多所饒益九萬二千夜叉神
皆發阿耨多羅三藐三菩提心增上慢比丘
有五百人未得謂得聞是法無增上慢信解

眞法一切諸法皆是一相不受諸法故漏盡得解脫於是菩薩衆中六萬二千人信解諸法無障礙相得無生法忍何以故說如是法諸說法中最爲第一善男子如我於然燈佛所信解諸法一相無礙然後乃得無生法忍具足六波羅蜜所以者何若菩薩於恒河沙劫布施持戒忍辱精進禪定智慧若不能知如是法相是人或能斷諸善根善男子汝見提婆達多有大功德善根成就三十二大人相有如是功德不知是法相故斷滅善根隨大地獄善男子當知雖久發心有大功德不入是法門皆能斷滅善根功德善男子如過去無量無邊不可思議阿僧祇劫有佛名高須彌山王如來應供正遍知明行足善逝世間解無上士調御丈夫天人師佛世尊壽九

十九百千萬億那由他歲國土名金焰明其國皆以黃金爲地其所說法亦以三乘度脫衆生其佛初會有八十百千萬億那由他聲聞弟子第二會七十百千萬億那由他聲聞弟子第三會六十百千萬億那由他聲聞弟子第八第四會五十百千萬億那由他聲聞弟子皆得阿羅漢捨諸重擔逮得已利盡諸有結正知解脫比丘尼衆倍於上數優婆塞衆亦倍上數優婆夷衆亦倍上數菩薩衆亦倍上數皆得阿惟越致無生法忍皆得無量無邊陀羅尼門三昧門能轉不退法輪何況新發菩薩意者又發辟支佛道心者亦無量無邊善男子爾時彼佛會中弟子衆數無量無邊彼金焰國中皆以七寶爲樹其諸寶樹常出法音所謂一切諸法空音無相音無作音無

生音無所有音無取相音其國人民聞是法音自然皆得諸法實相心得解脫其佛滅後法住千歲諸寶樹音亦不復出善男子是高須彌山王佛以法囑累淨威儀菩薩令守護法囑累已後便入無餘涅槃時有比丘名有威儀持戒清淨得四禪四無色定及五神通善誦毗尼藏樂於苦行而不能善知他心其弟子亦皆苦行貴頭陀法是淨威儀法師持戒清淨於無所有法忍中得巧方便後於一時淨威儀法師將諸弟子到有威儀比丘住處與共同止淨威儀法師憐愍衆生故從所住處常入聚落食訖而還教化百千萬家皆作弟子令發阿耨多羅三藐三菩提心其弟子衆亦善教化到諸聚落而爲說法令若干百千衆生皆發阿耨多羅三藐三菩提心有

威儀比丘常樂住塔寺其弟子衆不持淨戒而樂行頭陀有威儀比丘勤行精進其心決定自以所行化諸弟子貪著善法有所見得所謂說一切有爲法皆無常苦一切法無我不能善行諸禪定法亦復不能善於菩薩所行之道本心不純故淨威儀法師善知衆生諸根利鈍知有威儀比丘心故不復常入聚落其諸弟子如本不異有威儀比丘見淨威儀法師諸弟子衆常入聚落生不淨心即鳴捷椎集衆立制汝等自今以去不得入於聚落不能一心修行靜默數入聚落得何等利佛所稱讚阿蘭若住處汝等當行一心禪樂莫入他家淨威儀法師諸弟子衆不受其語猶入聚落後於一時有威儀比丘見彼弟子聚落中出更鳴捷椎集比丘衆說如是言若

復更入聚落中者不得住此爾時淨威儀法師將護有威儀比丘故告諸弟子汝等從今已去勿入聚落即受師教不入聚落爾時衆人不見其師及諸弟子故皆懷憂惱退失善根淨威儀法師三月自恣竟從是中去至餘僧坊於其所止師徒還入城邑聚落爲人說法後時有威儀比丘見淨威儀法師還入他家見其弟子毀失常儀復生惡心作是念言是比丘破戒毀戒何有善提便語衆人是比丘雜行去佛甚遠有威儀比丘起是業已後時命終是業果報故墮阿鼻大地獄九十百千億劫受諸苦惱從地獄出六十三萬世常被誹謗其罪漸薄後作比丘三十二萬世出家之後是業因緣反道入俗是業因緣有餘罪故值淨明佛出家入道慇懃精進如救頭

然千萬億歲中乃至不得柔順法忍無量千萬世諸根闇鈍師子遊步於汝意云何爾時有威儀比丘豈異人乎勿造斯觀則我身是我時起是微細不淨心故受此罪苦墮於地獄師子遊步若人不欲起是微細業者於彼菩薩不應起惡心菩薩所行皆當信解不應起於瞋惱之心應作是念我亦不能善知他心衆生所行是亦難知善男子如來見是利故常說是法是故行者不應平量於人唯有如來及似如來者乃能知之是故行者若欲自護身勿平量人而相違逆菩薩若欲修集佛法當晝夜勤心專念深發菩薩心者不當好求人之長短菩薩若能教三千大千世界其中衆生令行十善不如菩薩如一食頃一心靜處入一相法門乃至聞受讀誦解說其

人福德勝彼甚多何以故諸菩薩等用是法門能滅一切業障重罪亦於一切衆生之中離憎愛心便能疾得一切種智爾時文殊師利法王子白佛言世尊如佛所說滅業障罪云何能滅佛告文殊師利若諸菩薩見一切法性無業無報則能畢滅業障之罪又文殊師利若諸菩薩見貪欲際即是眞際見瞋恚際即是眞際見愚癡際即是眞際則能畢滅業障之罪又文殊師利若諸菩薩見一切衆生性即是涅槃性則能畢滅業障之罪所以者何若人因有所見即能起業無知無聞諸凡夫人不知諸法畢竟滅相自見其身亦見他人以是見故便起身口意業是人妄見憶想分別便作是念我是貪欲瞋恚愚癡如是分別故於佛法中出家學道復作是念我是

持戒修梵行者我應當得超度生死入於涅槃免諸苦惱是人分別諸法是善是不善是應知是應斷是應證是應修所謂苦應見集應斷滅應證道應修而復分別一切諸行皆悉無常一切諸行皆苦一切諸行皆三毒熾然我當疾捨此有爲法作是思惟於諸行中種種取相便生厭心爾時即作是念若見諸行如是是名見苦惡厭諸行是名斷集分別諸行見於滅諦即作是念我今見滅是名證滅我當修道便至靜處念如是法作是念已攝心定住是人先得厭心今得定心故於諸行中心便捨離而自愧厭不喜不樂復作是念我今於一切法中已得解脫更無所作我身已得阿羅漢道是人命終時見受生處即菩提中心生疑悔以此疑故命終後身墮大

常一

十二

地獄何以故是人於無生法中而分別故爾
時文殊師利法王子白佛言世尊今云何應
觀四聖諦佛告文殊師利若行者能見一切
法即是無生性是名見苦若能見一切法不
集不起是名斷集若能見一切法畢竟滅相
是名證滅若能見一切法無所有性是名修
道文殊師利若行者能如是見四聖諦是人
不作如是分別是法善是法不善是法應見
是法應斷是法應證是法應修所謂苦應見
集應斷滅應證道應修所以者何凡夫所行
貪欲瞋恚愚癡行者見是法皆空無生無所
有不可分別但積集虛妄爾時於法無所取
無所捨於三界中心無所礙見一切三界畢
竟不生見一切善不善法虛誑不實如幻如
夢如影如響如焰行者見貪欲性即是涅槃

性瞋恚性即是涅槃性愚癡性即是涅槃性
若能見一切法性如是便於一切衆生中不
起憎愛所以者何是行者不得是法若生愛
處若生憎處安住是處虛空中乃至不見
佛不見法不見僧是則不見一切法若不見
一切法於諸法中則不生疑不生疑故則不
受一切法不受一切法故則自寂滅文殊師
利長老須菩提知如是法故不來禮佛足須
菩提尚不自得身何況得如來身不得自身
而得如來身者無有是處文殊師利復白佛
言世尊行者云何應觀四念處佛告文殊師
利當來世有比丘如是說觀內身處若觀不
淨是身念處觀樂皆苦是受念處觀心生滅
性是心念處觀壞和合相但得法相是法念
處文殊師利白佛言世尊今云何真觀四念

處佛言止止文殊師利不須問是如來隨宜說法難可得解文殊師利言世尊愍念衆生故願爲說之佛告文殊師利若行者見身如虛空是爲身念處若行者知諸受不在內不在外是爲受念處若行者知心但有名字是爲心念處若行者不得善法不得不善法是爲法念處文殊師利應如是觀四念處文殊師利復白佛言世尊行者云何應觀八聖道分佛告文殊師利若行者見一切法平等無二無分別是名正見見一切法無思惟無分別以是見故是名正思惟見一切法無言說相善修語言平等相故是名正語見一切法不作相作者不可得故是名正業不分別正命邪命善修習平等命故是名正命不發不起一切法以無所行故是名正精進於一切

法無所憶念諸憶念性離故是名正念見一切法性常定以不散不緣不可得故是名正定文殊師利行者應如是觀八聖道分文殊師利復白佛言世尊行者云何應觀五根佛告文殊師利若行者信一切法畢竟不生從本以來常自爾故是名信根於一切法中心無所作遠近相離故是名精進根於一切法無所憶念緣性離故不繫念於緣是名念根於一切法無所思惟二法不可得故是名定根見一切法常空離於生相故是名慧根文殊師利行者應如是觀五根文殊師利復白佛言世尊行者云何應觀七菩提分佛告文殊師利若行者能見一切法無憶念是名念菩提分若一切法若善若不善若無記不可選擇不可得無決定故是名擇菩提分若不

取一切三界相善壞三界相故是名精進菩提分若一切有為法中不生喜相善壞有喜相故是名喜菩提分若一切法中除却其心緣相不可得故是名除菩提分若一切法不可得善修壞相故是名定菩提分若於一切法無所依止不貪不著不見一切法故捨得心是名捨菩提分文殊師利行者應如是觀七菩提分若行者能如是見四聖諦四念處八聖道分五根七菩提分我說是人名為已得度者到於彼岸出在陸地無畏之處已離重擔除諸塵垢是人名為無所有者無所憂者無所受者名阿羅漢是名沙門是名婆羅門是名比丘是名澡浴清淨者是名智者解脫者是名聞者是名佛子是名釋子是名破刺棘者是名却關鍵者是名已度塹者是名

第一

十五

出欲求者是名開門扇者是名賢聖勝相者文殊師利若有比丘成就如是法者於天人世間名為福田應受供養文殊師利若比丘不欲虛食國中施者破壞魔網者欲度生死海者欲得涅槃者欲脫一切苦惱者欲為一切天人世間作福田者應當勤修習如是之法說是法時三萬二千諸天得諸法實相各以天曼陀羅華而散佛上作是言世尊若人得聞如是經法是人名為善出家者何況信受讀誦如所說行世尊若有須臾聞是法者是則名為無增上慢爾時文殊師利法王子白佛言唯願世尊當說陀羅尼以是陀羅尼故令諸菩薩得無礙辯才於諸音聲無所怖畏能令諸法皆作佛法信解諸法皆是一相佛告文殊師利汝今諦聽當為汝說不動相

種性法門若諸菩薩得入是法門者能以智
慧光明照一切法疾得無生法忍文殊師利
白佛言世尊云何名不動處種性法門佛告
文殊師利一切衆生其心皆一是名種性世
尊云何是事名爲種性佛言文殊師利一切
衆生皆無有心緣性不可得故是名種性文
殊師利一切衆生皆同一量是名種性世尊
云何是事名爲種性佛言一切衆生皆如虛
空量終歸無障礙是名種性文殊師利一切
衆生皆是一衆生是名種性世尊云何是事
名爲種性文殊師利一切衆生皆是一相畢
竟不生離諸名字一異不可得故是名種性
文殊師利貪欲是不動相世尊云何是事名
不動相佛言文殊師利貪欲是不動相安住
法性中以不住故是貪欲不可得性常離故

是名不動相文殊師利瞋恚是金剛世尊云
何是事名爲金剛文殊師利瞋恚不可斷不
可壞亦如金剛不可斷不可壞一切法亦如
是不可斷不可壞諸法本不決定故是名如
金剛文殊師利愚癡是智慧性世尊云何是
事名智慧性文殊師利一切法離智慧亦離
愚癡譬如虛空無有智慧亦無愚癡一切法
亦如是無有智慧亦無愚癡智慧愚癡智可
知法從本已來俱寂滅故是名智慧處文殊
師利色陰是不動處世尊云何是事名不動
處文殊師利如天帝之幢深根安固不可動
搖一切法亦如是以不住法故安住法性中
是法無來處無去處無取無捨安住無住處
故是故色名不動相文殊師利受陰是滅性
世尊云何是事名爲滅性文殊師利一切諸

受相性常寂滅故諸受非內非外非東方非南西北方四維上下來何以故若樂受在內一切衆生常應是樂若苦受在內一切衆生常應是苦若不苦不樂受在內一切衆生常應不苦不樂文殊師利令一切諸受實不在內不在外不在兩中間不在東方南西北方四維上下是故一切諸受如草木瓦石畢竟不生不滅無想相是故受名寂滅相文殊師利想陰是種性世尊云何是事名為種性文殊師利是想皆憶想分別起從虛妄法中生譬如空拳如野馬本性自離是故想陰名種性文殊師利行陰是種性世尊云何是事名種性文殊師利一切諸行離數無數入平等數譬如芭蕉畢竟無實本性自爾一切法亦如是無名字無性是故行陰名種性文殊師

利識陰是種性世尊云何是事名為種性文殊師利是識如幻無實無起無生空無相無作如五指塗空空無相現是故識陰名為種性文殊師利色是種性世尊云何色為種性文殊師利譬如鏡中像雖可目見而無有實一切色亦如是雖見無實但誑眼誑心虛妄不實是故色為種性文殊師利聲是種性世尊云何聲是種性文殊師利一切法無別異相畢竟空如山中響是故聲為種性文殊師利香是種性世尊云何香是種性文殊師利一切法無香相性無知故空如虛空鼻香識者皆不可得是故香為種性文殊師利味是種性世尊云何味為種性文殊師利味性即是不可思議性不可知離於知故自性常離故是故味名種性文殊師利觸是種性世尊

云何觸是種性文殊師利觸如虛空其性自離無觸無合一切法亦如是善壞身故離於觸相觸者不可得故是故觸是種性文殊師利法是種性世尊云何法是種性文殊師利一切法無相無心離心性離名字無決定故皆是法性相是故法是種性文殊師利地是種性世尊云何地是種性文殊師利一切法無堅相無軟相虛妄和合人以為堅是故地為種性文殊師利水是種性世尊云何水是種性文殊師利一切法無濕無合如野馬無水是故水為種性文殊師利火是種性世尊云何火是種性文殊師利一切法無熱相離虛妄熱相本性常寂滅離顛倒故分別其實無定無生是故火為種性文殊師利風是種性世尊云何風是種性文殊師利一切法無

障無礙無相無性不動搖故離風相故是故風為種性文殊師利佛是種性世尊云何佛為種性文殊師利一切法無覺無知離知相故是故佛為種性文殊師利法是種性世尊云何法是種性文殊師利諸法不可壞不可斷離壞斷故無相無名無性出言語道是故法名種性文殊師利僧是不動相世尊云何僧是不動相文殊師利聖眾安住如法性實際定亂平等中安住智慧愚癡解脫煩惱平等一切法中心無所住住法不可得故是故僧名不動相文殊師利一切法行處名為不動相世尊云何是事名為不動相文殊師利一切法虛空行處不可思議行處斷行處無根本無別異不可得故是故一切行處名不動相文殊師利一切法無緣名不動相世尊

云何是事名不動相文殊師利一切法無依止無住處無緣無順離諸緣故是故一切法無緣名不動相文殊師利一切法不取不捨相名不動相世尊云何是事名不動相文殊師利一切法皆歸於如同於法性是法不可取不可捨無求無願諸願斷故從本已來常寂滅相同於虛空是故不取不捨名不動相文殊師利一切法無咎名不動相世尊云何是事名不動相文殊師利一切法無垢無所有清淨顯曜如虛空無翳諸罪定相不可得故是故一切法無咎名不動相文殊師利一切法無歸處名不動相世尊云何是事名不動相文殊師利一切法空無根本故無歸處是故無歸處名不動相文殊師利一切法無學名不動相世尊云何是事名不動相文殊

師利一切法性無學不應學不應修不應思
不應念不應住不應發不應行不應斷不應
證不應語不應說不應求不應取不應捨不
應離不應除何以故文殊師利一切法相畢
竟離故從本已來無所取常是捨相是諸法
非智慧所及非愚癡所及是故無學名不動
相

諸法無行經卷上

音釋

憤

憤古對切捷捷也植楚語也此云鐘亦云磬律
日捷也捷捷也植楚語也此云鐘亦云磬律
寒切捷捷也植楚語也此云鐘亦云磬律

寒切捷極捷巨漸土坑也七豔切

寒切椎音椎漣坑也

諸法無行經卷下

常二

姚秦三藏法師鳩摩羅什譯

爾時文殊師利法王子白佛言世尊我亦樂說不動相佛言汝樂說者便可說之文殊師利言世尊一切衆生皆得菩提是名不動相

第二

文殊師利云何是事名不動相世尊一切法無向無得一切衆生皆入菩提性中是故說一切衆生皆得菩提又是菩提非是得相何以故衆生性即是菩提是故一切衆生皆得菩提名不動相世尊一切衆生皆成就一切智慧名不動相文殊師利云何是事名不動相世尊一切衆生無性性故入如來平等中從本已來是一切智慧性性同故名不動相世尊一切衆生皆是道場是不動相文殊師利云何是事名不動相世尊道場者有何義

文殊師利一切法寂滅相無生相無所有相不可取相是名道場義世尊一切衆生不入此道場耶佛言如是如是是故世尊一切衆生皆是道場名不動相世尊一切衆生皆得無生法忍名不動相文殊師利云何是事名不動相世尊一切衆生無盡無生無滅性離無性入平等忍故是故一切衆生皆得無生法忍名不動相世尊一切衆生皆得無礙辯才名不動相文殊師利云何是事名不動相世尊一切衆生諸所有樂說於十方界索不可得所以者何入無礙辯才平等法中故世尊諸所樂說自性皆離無決定故無所有是故一切衆生皆得無礙辯才名不動相世尊一切衆生皆得陀羅尼名不動相文殊師利云何是事名不動相世尊一切衆生相虛誑

不實憶想分別取相故能持色聲香味觸法
是故一切衆生皆得陀羅尼名不動相世尊
一切衆生皆得慈心名不動相文殊師利云
何是事名不動相世尊一切衆生無衆生性
從本已來無瞋無慈得瞋慈平等無分別故

第二

是故一切衆生皆得慈心名不動相世尊一
切衆生皆成就大悲名不動相文殊師利云
何是事名不動相世尊一切衆生無起無作
相皆入如來平等法中不出大悲之性以惱
悲無分別故是故一切衆生皆成就大悲名
不動相世尊一切衆生皆得三昧名不動相
文殊師利云何是事名不動相世尊一切衆
生性常定離諸緣故若衆生從緣生知於緣
中知生不名爲知所以者何諸知念念無常
畢竟空故是故一切衆生皆成就三昧名不

動相世尊一切諸佛成就貪欲名不動相文
殊師利云何是事名不動相世尊一切諸佛
皆入貪欲平等法中故遠離諍訟通達貪欲
性故又世尊貪欲即是菩提何以故知貪欲
實性說名菩提是故一切諸佛皆成就貪欲
名不動相世尊一切諸佛皆成就瞋恚名不
動相文殊師利云何是事名不動相世尊一
切諸佛皆說有爲法過罪者安住瞋恚平等
性中通達瞋恚性故名一切諸佛皆成就瞋
恚名不動相世尊一切諸佛皆成就愚癡名
不動相文殊師利云何是事名不動相世尊
一切諸佛能度一切貪著名字衆生安住愚
癡平等性中通達愚癡性故名一切諸佛
成就愚癡名不動相世尊一切諸佛皆成就
身見名不動相文殊師利云何是事名不動

第三

三

相世尊一切諸佛安住身見性中於一切法中不退不畏不動畢竟安住以不住法故通達知身見無生無起無性故是故一切諸佛皆成就身見名不動相世尊一切諸佛皆是邪見名不動相文殊師利云何是事名不動相世尊一切諸佛示一切有爲法是邪虛誑不實者通達邪見性平等故是故一切諸佛皆是邪見名不動相世尊一切諸佛住四顛倒五蓋五欲三毒中得阿耨多羅三藐三菩提名不動相文殊師利云何是事名不動相世尊住處性即是非住處文殊師利非住處有何義世尊非住處者退轉動還相即是一切凡夫人一切諸佛安住是貪欲瞋恚愚癡四顛倒五蓋五欲平等中是諸佛安住貪欲性故得阿耨多羅三藐三菩提安住瞋恚愚

癡四顛倒五蓋五欲性故得阿耨多羅三藐三菩提是故一切諸佛住四顛倒五蓋五欲三毒中得阿耨多羅三藐三菩提名不動相爾時佛告文殊師利法王子若有人問汝斷一切不善法成就一切善法名爲如來者汝云何答文殊師利言世尊若有人問我斷一切不善法成就一切善法名爲如來者我當如是答善男子汝先當親近善知識修集善道於法無所合無所離勿取勿捨勿緣勿求勿舉勿下勿求勿覓勿願勿分別諸法是上第二是中是下然後當知不可思議行處無行處斷行處佛所行處佛告文殊師利汝如是答者爲答何義文殊師利言世尊我如是答者爲無所答世尊如是如佛坐於道場頗見法有生有滅不佛言不也世尊若法無生無滅

是法可得說斷一切不善法成就一切善法
不佛言不也世尊若法不生不滅不斷一切
不善法不成就一切善法是法何所見何所
斷何所證何所修何所得說是語時虛空中
萬天子以天青黃赤白蓮華散佛文殊師利
上皆下禮佛及文殊師利足而作是言世尊
文殊師利名為無礙尸利文殊師利名為不
二尸利名為無餘尸利名為無所有尸利名
為如尸利法性尸利實際尸利第一尸利上
尸利無上尸利文殊師利語諸天子言止止
諸天子汝等勿取相分別我不見諸法是上
是中是下如汝所說文殊師利義者我是貪
欲尸利瞋恚尸利愚癡尸利是故我名文殊
師利諸天子我不出貪欲瞋恚愚癡凡夫人
分別諸法求過出至到諸菩薩於法無過無

常

五

出無至無到諸天子言菩薩不到十地不至
佛法耶文殊師利言於諸天子意云何幻人
能到十地至佛法不諸天子言幻人尚無住
處何況從此住地至於餘地文殊師利言諸
天子一切法如幻無去無來無過無出無至
無到諸天子言汝不當得阿耨多羅三藐三
菩提耶文殊師利言諸天子於意云何凡夫
貪欲覆心能坐道場得一切智不諸天子言
不也諸天子言文殊師利汝今貪欲覆心是
凡夫耶文殊師利言如是如是我是凡夫從
貪欲起從瞋恚起從愚癡起我是外道是邪
行人諸天子言以何事故自言我是凡夫從
貪欲起瞋恚起愚癡起文殊師利言是貪欲
瞋恚愚癡性十方求之不可得我以不住法
住是性中故說言我是凡夫三毒所覆文殊

師利汝云何名外道文殊師利言我終不到外道諸道性不可得故我於一切道爲外諸天子言汝云何是邪行人文殊師利言我已知一切法皆是邪虛妄不實是故我是邪行人說是法時萬天子得聞是語皆得無生法忍各作是言是諸衆生皆得大利得聞是真正金剛語句何況聞已信解受持讀誦爲人解說如說修行當得無礙辯才一切法中得真慧照明巧說諸法一相一門亦能示衆生一切諸法皆是佛法爾時華嚴慧菩薩白佛言世尊願說入音聲慧法門令當來菩薩聞如是法不驚不怖亦知一切音聲究竟之性不疑不悔於諸音聲無所障礙佛言止止用問是事爲是入音聲慧法門不應於新發意菩薩前說所以者何新發意者不能解不能

第一

六

知不能思若菩薩摩訶薩入是音聲慧法門者假使有人於恒河沙劫惡口罵詈誹謗毀訾是人不生恚恨若人於恒河沙劫以一切樂具供養不生愛心譬如漏盡阿羅漢一切愛處不生愛心一切瞋處不生瞋心善男子入是音聲慧法門菩薩於利衰毀譽稱譏苦樂已過是八法心不傾動如須彌山王爾時華嚴慧菩薩復白佛言願必爲說入音聲慧法門當來菩薩得聞是法門當自知過咎亦教餘人爾時佛告華嚴慧菩薩善男子汝今諦聽善思念之當爲汝說唯然世尊願樂欲聞佛告華嚴慧菩薩若菩薩聞貪欲音聲生過罪想聞離貪欲音聲生利益想即是不學佛法若聞瞋恚音聲生過罪想聞離瞋恚音聲生利益想即是不學佛法聞愚癡音聲生

過罪想聞離愚癡音聲生利益想即是不學佛法若於少欲音聲生喜想於多欲音聲生礙想即是不行音聲法門於知足音聲生喜想於不知足音聲生礙想即是不行音聲法門若於細行音聲生喜想於麤行音聲生礙想即是不行音聲法門若於樂靜音聲則喜於憤鬧音聲則礙則不學佛法若於忍辱音聲生利想於瞋恚音聲生礙想則不學佛法若於精進音聲生利想於懈怠音聲生礙想即是不學佛法於禪定音聲生利想於散亂音聲生礙想即是不學佛法於智慧音聲生利想於愚癡音聲生礙想則不學佛法若於近道音聲生喜於遠道音聲生礙則不學音聲法門於生死見過咎於涅槃見利益則不入音聲法門於彼岸則喜於此岸則礙則不

學音聲法門於聚落音聲生礙想於空閑音聲生喜想則不學音聲法門若於獨行音聲生喜想於衆行音聲生礙想則不學音聲法門於比丘所行音聲生喜想於白衣所行音聲生礙想則不學音聲法門於有威儀則喜於無威儀而礙則不學佛法於清淨行則喜於不清淨行而礙則不學佛法於不雜行則喜於雜行而礙則不學佛法於離欲行則喜於婬欲行而礙則不學佛法於離瞋恚相則喜於瞋恚相而礙則不學佛法於離癡相則喜於癡相而礙則不學佛法於空則喜於有而礙則不學佛法於無相則喜於有相而礙則不學佛法於無作則喜於有作而礙則不學佛法於菩薩行則喜於聲聞辟支佛行而礙則不學佛法若說菩薩過咎則遠阿耨多

羅三藐三菩提亦受業障罪若說菩薩威儀過罪則遠阿耨多羅三藐三菩提於他菩薩生下想於已生勝想則爲自傷亦受業障罪若菩薩欲教餘菩薩當生佛想然後教之菩薩若欲不捨阿耨多羅三藐三菩提不應生心輕餘菩薩善男子無有滅失功德如輕慧餘菩薩者是故菩薩若欲守護功德善根亦於一切法中得無障礙慧當晝夜各三時禮一切求佛道菩薩爾時文殊師利法王子白佛言世尊如我知佛所說義貪欲音聲佛音聲等無有異瞋恚音聲佛音聲等愚癡音聲佛音聲等外道音聲佛音聲等少欲音聲多欲音聲等知足音聲不知足音聲等細音聲麤音聲等樂獨音聲樂衆音聲等此岸音聲彼岸音聲等遠音聲近音聲等生死音聲涅槃音聲等聚落音聲空閑音聲等施音聲慳音聲等持戒音聲毀戒音聲等忍辱音聲瞋恚音聲等精進音聲懈怠音聲等禪定音聲散亂音聲等智慧音聲愚癡音聲等爾時華嚴慧菩薩問文殊師利法王子以何因緣故皆等文殊師利言天子於意云何貪欲音聲何者爲是天子言是貪欲音聲空如響法文殊師利言汝知佛音聲亦復云何天子言不出於空亦如響法文殊師利言以是因緣故我說二音聲皆是平等爾時佛告文殊師利汝先世住初發意地未入如是諸法相時爲起何障礙罪汝今說之當來世中假名菩薩聞汝所說障礙之罪當自守護文殊師利白佛言唯然世尊我當自說障礙之罪設聞是者當有憂怖然其必能滅障業罪亦於一切

法中得無礙慧世尊乃往過去無量無邊不可思議阿僧祇劫爾時有佛號師子吼鼓音王如來應供正遍知明行足善逝世間解無上士調御丈夫天人師佛世尊其佛壽命十萬億那由他歲以三乘法而度衆生國名千光明其國樹木皆七寶成其樹皆出如是法音所謂空音無相音無作音無生音無所有音無取相音以是諸法之音令衆生得道其師子吼鼓音王佛初會說法九十九億聲聞弟子皆得阿羅漢諸漏已盡捨諸重擔逮得已利盡諸有結以正智得解脫菩薩衆亦九十九億皆得無生法忍能善入種種法門親近供養若干百千萬億諸佛亦爲若干百千萬億諸佛之所稱歎能度若干百千萬億無量衆生能生無量陀羅尼門能起無量百千

萬億三昧門及餘新發菩薩意者不可稱數其佛國土無量莊嚴說不可盡彼佛住世教化已訖入無餘涅槃滅度之後法住六萬歲諸樹法音皆不復出爾時有菩薩比丘名曰喜根時爲法師質直端正不壞威儀不捨世法爾時衆生普皆利根樂聞深論其喜根法師於衆人前不稱讚少欲知足細行獨處但教衆人諸法實相所謂一切法性即是貪欲性貪欲性即是諸法性瞋恚性即是諸法性愚癡性即是諸法性其喜根法師以是方便教化衆生衆生所行皆是一相不相是非所行之道心無恚礙無恚礙因緣故疾得法忍於佛法中決定不壞世尊爾時復有比丘法師行菩薩道名曰勝意其勝意比丘護持禁戒得四禪四無色定行十二頭陀世尊是勝

意比丘有諸弟子其心輕動樂見他過世尊
後於一時勝意菩薩入聚落乞食誤至喜根
弟子家見舍主居士子即到其所敷座而坐
爲居士子稱讚少欲知足細行說無利語過
讚歎遠衆樂獨行者又於居士子前說喜根
法師過失是比丘不實以邪見道教化衆生
是雜行者說姪欲無障礙瞋恚無障礙愚癡
無障礙一切諸法皆無障礙是居士子利根
得無生法忍即語勝意比丘大德汝知貪欲
爲是何法勝意答言居士我知貪欲是煩惱
居士子言大德是煩惱爲在內外耶勝意答
言不在內不在外大德若貪欲不在內不在
外不在東西南北四維上下十方即是無生
若無生者云何是垢是淨爾時勝意比丘瞋
恚不喜從座起去作如是言是喜根比丘以

常二

十一

妄語法多惑衆人是勝意比丘以不學入音
聲法門故聞佛音聲則喜聞外道音聲則瞋
於梵行音聲則喜於非梵行音聲則瞋以不
學入音聲法門故於淨音聲則喜於垢音聲
則瞋以不學入音聲法門故於聖道音聲則
喜於凡夫音聲則瞋以不學入音聲法門故
於樂音聲則喜於苦音聲則瞋以不學入音
聲法門故於出家音聲則喜於在家音聲則
瞋以不學入音聲法門故於出世間音聲則
喜於世間音聲則瞋以不學入音聲法門故
於布施則生利想於慳則生礙想以不學佛
法故於持戒則生利想於毀戒則生礙想是
勝意比丘出其舍已還到所止於比丘僧中
見喜根菩薩語衆人言是比丘多以虛妄邪
見教化衆生所謂姪欲非障礙瞋恚非障礙

愚癡非障礙一切法非障礙爾時喜根菩薩
作是念是比丘今者必當起於障礙罪業我
今當爲說如是深法乃至令作修助菩提道
法因緣爾時喜根菩薩於比丘僧前說是諸
偈

貪欲是涅槃 患癡亦如是 於此三事中
有無量佛法 若有人分別 姪欲及瞋恚
是人去佛遠 譬如天與地 菩提與貪欲
是一而非二 皆入一法門 平等無有異
凡人聞怖畏 去佛道甚遠 貪欲不生滅
不能令心惱 若人有我心 及有得見者
是人爲貪欲 將入於地獄 貪欲之實性
即是佛法性 佛法之實性 亦是貪欲性
是二法一相 所謂是無相 若能如是知
則爲世間導 若有人分別 是持戒毀戒

常二

十二

以持戒狂故 輕蔑於他人 是人無菩提
亦無有佛法 但自安住立 有所得見中
若住空閑處 自貴而賤人 尚不得生天
何況於菩提 皆由著空閑 住於邪見故
邪見與菩提 皆等無有異 但以名字數
語言故別異 若人通達此 則爲近菩提
分別煩惱垢 即是著淨見 無佛菩提法
住有得見中 若貪著佛法 是則遠佛法
貪無礙法故 則還受苦惱 若人無分別
貪欲瞋恚癡 入三毒性故 則爲見菩提
是人近佛道 疾得無生忍 若見有爲法
與無爲法異 是人終不得 脫於有爲法
若知二性同 必爲人中尊 佛不見菩提
亦不見佛法 不著諸法故 降魔成佛道
若欲度衆生 勿分別其性 一切諸衆生

皆同於涅槃 若能如是見 是則得成佛
 其心不閑寂 而現寂靜相 是於天人中
 則爲是大賊 是人無菩提 亦無有佛法
 若作如是願 我當得作佛 如是之凡夫
 無明力所牽 佛法甚清淨 其喻如虛空
 此中無可取 亦無有可捨 佛不得佛道
 亦不度衆生 凡夫強分別 作佛度衆生
 是人於佛法 則爲甚大遠 若見衆生苦
 則是受苦者 衆生無衆生 而說有衆生
 住衆生相中 則無有菩提 若人見衆生
 是畢竟解脫 無有婬恚癡 知是爲世將
 若人見衆生 不見非衆生 不得佛法實
 佛同衆生性 若能如是知 則爲世間導
 若人欲成佛 莫壞貪欲性 貪欲性即是
 諸佛之功德 若人欲發心 隨順菩提道

莫自有分別 心異於菩提 發心即菩提
 知是爲世將 若說外道惡 稱佛世中尊
 是二說不異 知是爲世將 若人求菩提
 是人無菩提 若見菩提相 是則遠菩提
 菩提非菩提 佛陀非佛陀 若知是一相
 是爲世間導 若人作是念 我當度衆生
 即著衆生相 是人無菩提 亦無有佛法
 住於有見中 貪欲無內外 亦不在諸方
 分別是空法 凡夫爲所燒 如幻如焰響
 如夢石女兒 諸煩惱如是 決定不可得
 不知是空故 凡夫爲狂惑 若求煩惱性
 煩惱即是道 若有人分別 是道是非道
 是人終不得 無分別菩提 凡夫畏佛法
 去佛法甚遠 若不疑空法 是人得菩提
 一切有爲法 即是無爲法 是數不可得

無數故無爲 若以菩提心 自高無所畏

自念當作佛 是人無菩提 亦無有佛法

離菩薩寶印 若有但讀經 憶想而分別

不深思義趣 但爲貪名利 自念當作佛

必成無有疑 唯貪於名利 讀經住閑靜

分別少欲行 常二 還爲貪所牽 若欲捨遠貪 十四

不得遠於貪 若遠貪法實 是人能離貪

雖長夜持戒 得諸無礙禪 不入佛法味

不得法實際 知法無有性 不沒一切法

不言戒非戒 得脫有見中 以無持戒性

是知持戒法 如是知戒相 終不毀於戒

諸佛之法王 法藏巨思議 無量方便力

引導諸衆生 以一相法門 令入寂滅道

凡夫聞佛說 無我無有法 一相自性空

不信墮深坑 雖白衣受欲 聞是法不畏

勝行頭陀者 住在有見中 現在十方佛

利益諸世間 知法如虛空 皆已得菩提

若有無知者 樂於分別法 聞是實相法

則生疑怖畏 是人無量劫 備受諸苦分

說是諸偈法時三萬諸天子得無生法忍萬

八千人漏盡解脫即時地裂勝意比丘墮大

地獄以是業障罪因緣故百千億那由他劫

於大地獄中受諸苦毒七十四萬世常被誹

謗若干百千劫乃至不聞佛名字自是已後

還得值佛出家學道而無志樂於六十二萬 十五

世常反道入俗亦以是業障餘罪故於若干

百千世諸根闇鈍世尊爾時喜根法師於今

東方過十萬億佛土有國名寶莊嚴於中得

阿耨多羅三藐三菩提號曰勝光明威德王

如來應供正遍知今現在其勝意比丘今我

身是世尊我未入如是法相門時受如是苦分別苦顛倒苦是故若有發菩提心者若發小乘心者不欲起如是業障罪不欲受如是苦者不應拒逆佛法無有處所可生瞋礙佛告文殊師利汝聞是諸偈得何等利世尊我畢是業障罪已聞是偈因緣故在所生處利根智慧得深法忍得決定忍巧說深法文殊師利爲誰力故能憶如是無量阿僧祇劫罪業因緣世尊諸菩薩有所念有所說有所思惟皆是佛之神力所以者何一切諸法皆從佛出佛告文殊師利若得佛十力若有聞是經者等無有異若得無生法忍聞是經者亦等無異文殊師利言如我知佛所說義聞此經者得無量不可思議功德之利文殊師利如是如是聞是經者得無量不可思議功德

之利但佛不廣說何以故不修道不精進如是惡人聞說是利則不能信受爾時文殊師利法王子及彌勒菩薩白佛言世尊護念是經於未來世後五百歲當令此經普演流布皆得受持魔若魔天不得其便爾時佛欲護念是經法故左右顧眄即時十方恒河沙無量國土六種震動如是則爲護念是經及十方恒河沙諸佛亦護念是經說是經時十方國土中恒河沙等無量衆生得無生法忍何況得聲聞無學者何況住學地者爾時阿難即從座起偏袒右肩白佛言世尊當以何名斯經云何奉持佛告阿難是經名爲諸法無行說是經已文殊師利法王子彌勒菩薩摩訶薩師子遊步菩薩摩訶薩華戲慧天子等一切菩薩衆及阿難天人阿脩羅等聞佛所

說皆大歡喜

諸法無行經卷下

音釋

眇 邪視也切
詈 力置切
誹 數尾切
訾 將几切
懷 莫結切
輕 易也